

七十二家集

楊侍郎集卷之四

漢蜀郡楊雄子雲著

明閩漳張燮紹和纂

箴

百官箴

初楊雄依虞箴作十二州二十五官箴其九
箴亡闕後涿郡崔駰及子瑗又臨邑侯劉駒
駰增補十六篇胡廣復繼作四篇文甚典美
乃悉撰次首目爲之解釋名曰百官箴凡四

十八篇

范曄序

冀州牧箴

洋洋冀州鴻原大陸岳陽是都島夷皮服潺湲
河流夾以碣石三后攸降列爲侯伯降周之末
趙魏是宅冀土糜沸炫沍如湯更盛更衰載從
載橫陪臣擅命天王是替趙魏相反秦拾其弊
北築長城恢夏之塲漢興定制收封藩王仰覽
前世厥力孔多初安如山後崩如崖故治不忘
亂安不遺危周室自怙云焉有予隳六國奮矯

果絕其維牧臣司冀敢告在階

交州牧箴

悠悠濟河交州之寓九河旣導雷夏攸處草繇
水條漈絲締紉濟潔旣通降丘宅土成湯五徙
卒都于亳盤庚北渡牧野是宅丁感雝雝祖已
伊忠爰正厥事遂緒高宗厥後陵遲顛覆湯緒
西伯戡黎祖伊奔走致天威命不恐不震婦言
是用牝雞是晨三仁旣知武果戎殷牧野之禽
豈復能耽甲子之朝豈能復笑有國雖久必畏

天咎有民雖長必懼人殃箕子歔歔厥居爲墟
牧臣司寇敢告執書

青州牧箴

茫茫青州海岱是極鹽鐵之地鉛松怪石群水
攸歸萊夷作牧貢篚以時莫怠莫違昔在文武
封呂於齊厥土塗泥在丘之營五侯九伯是討
是征焉殆其衡御失其度周室荒亂小白以霸
諸侯僉服復尊京師小白旣沒周卒凌遲嗟茲
天王附命下土失其法度喪其文武牧臣司青

敢告執矩

徐州牧箴

海岱伊淮東海是渚徐州之土邑子蕃宇大野
旣潞有羽有蒙孤桐蠙珠泗沂攸同實列蕃蔽
侯衛東方民好農蠶大野以康帝癸及辛不祗
不恪沈湎于酒而忘其東作天命湯武勦絕其
緒祚降周任姜鎮于瑯琊姜姓絕苗田氏攸都
事由細微不慮不圖禍如丘山本在萌芽牧臣
司徐敢告僕夫

楊州牧箴

矯矯揚州江漢之潁彭蠡既瀦陽烏攸處橘柚
羽貝琤琤篠簜閩越北垠沅湘攸往嶺矣淮夷
蠢蠢荆蠻翩彼昭王南征不旋人咸躋於垤莫
躋於山咸跌於汚莫跌於川明哲不云我昭董
蒙不云我昏湯武聖而師伊呂桀紂悖而誅逢
干蓋邇不可不察遠不可不親靡有孝而達父
罔有義而忘君太伯遜位基吳紹顓夫差一誤
太伯無祚周室不匡勾踐入霸當周之隆越裳

重譯春秋之末侯甸叛逆元篋不貢不思服膺
不可不孳堯崇屢省舜盛欽譴牧臣司楊政告
執箠

荊州牧箴

沓沓巫山在荆之陽江漢朝宗其流湯湯夏君
遭鴻荆衡是調雲夢塗泥包匭菁茅金石砥礪
象齒元龜貢篚百物世世以饒戰戰慄慄至桀
荒濫曰我在帝位若天有日不順庶國孰敢余
奪亦有成湯果秉其鉞放之南巢號之以桀南

巢茫茫包楚與荆風慄以悍氣銳以剛有道後
服無道先強世雖安平無敢逆豫牧臣司荆敢
告執御

豫州牧箴

郁郁荆河伊雒是經榮播泉滌惟用攸成田田
相孳廬廬相距夏殷不都成周攸處豫野所居
爰在鵲墟四隩咸宅寓內莫如陪臣執命不慮
不圖王室陸遲喪其爪牙靡哲靡聖損失其正
方伯不維韓卒擅命文武孔純至厲作昏成康

孔寧至幽作傾故有天下者母曰我大莫或余
敗母曰我強靡克余亡夏宅九州至於季世放
于南巢成康太平降及周微帶蔽屏營屏營不
起施于孫子至赧爲極實絕周祀牧臣司豫敢
告柱史

益州牧箴

巖巖岷山古曰梁州華陽西極黑水南流茫茫
洪波鯨堙降陸于時八都厥民不隩禹導江沱
岷嶓啟乾遠近底貢磬錯砮丹絲麻條暢有粳

有稻自京徂畛民攸溫飽帝有桀紂涵沈頗僻
遇絕苗民滅夏殷績爰周受命復古之常幽厲
夷業破絕爲荒秦作無道三方潰叛義兵征暴
遂國于漢拓開疆宇恢梁之野列爲十二光羨
虞夏牧臣司梁是職是圖經營盛衰敢告士夫
雍州牧箴

黑水西河橫截崑崙邪指閭闔畫爲雍垠上侵
積石下礙龍門自彼氏羌莫敢不來庭莫敢不
來匡每在季主常失厥緒候紀不貢荒侵其寘

陵遲衰微秦隸以戾興兵山東六國顛沛上帝
不寧命漢作京隴山以徂列爲西荒南排勁越
北救彊胡并連屬國一護攸都蓋安不忘危盛
不諱衰牧臣司雍敢告贅衣

幽州牧箴

蕩蕩平川惟冀之別阨幽都戎夏交偪伊昔
唐虞實爲平陸周末荐臻追于獯鬻晉溺其陪
周使不阻六國擅權燕趙本都東限穢貊羨及
東胡彊秦北排蒙公城疆大漢初定介狄之荒

元戎屢征如風之騰義兵涉漠偃我邊萌既定
皇康復古虞唐盛不可不圖衰不可或忘隄潰
蟻穴器漏箴芒牧臣司幽敢告侍傍

并州牧箴

雍別朔方河水悠悠北辟獯鬻南界涇流畫茲
朔土正直幽方自昔何焉莫敢不來貢莫敢不
來王周穆遐征犬戎不享爰貊伊德侵玩上國
宣王命將攘之涇北宗周罔職日用奕蹉既不
俎豆又不干戈犬戎作亂斃于驪阿太上曜德

其次曜兵德兵俱顛靡不悴荒牧臣司并敢告
執綱

交州牧箴

交州荒裔水與天際越裳是南荒國之外爰是
開闢不羈不絆周公攝祚白雉是獻昭王陵遲
周室是亂越裳絕貢荆楚逆叛四國內侵蠶食
周宗臻于季赧遂入滅亡大漢受命中國兼該
南海之宇聖武是恢稍稍受羈遂臻黃支杭海
三萬來牽其犀盛不可不憂隆不可不懼顧瞻

陵遲而忘其規摹亡國多逸豫而存國多難泉
竭中虛池竭瀕乾牧臣司交敢告執憲

光祿勲箴

經兆宮室畫爲中外廊殿門闥限以禁界國有
周衛民有藩籬各有攸保守以不岐昔在夏殷
桀紂淫湎持牛之飲門戶荒亂郎雖執戟謁者
參差殿中成市或鼓或鞀忘其廊廟而聚夫逋
逃四方多罪載號載呶內不可不省外不可不
清德人立朝議士充庭祿臣司光敢告執經

衛尉箴

茫茫上天崇高其居設置山險畫爲防禦重垠
累垓以難不律闕爲城衛以待暴卒國有以固
民有以內各保其守永脩不敗維昔庶僚官得
其人荷戈而歌中外以堅齊桓曄惕宿衛不飭
門非其入戶廢其職曹子標劍遂成其詐軻挾
七首而衛人不寤二世妄宿敗於望夷閭樂矯
搜戟者不誰尉臣司衛敢告執維

太僕箴

蕭蕭大僕車馬是供鏘鏘和鸞駕彼時龍昔在
上帝巡狩四宅王用三驅前禽是射紂作不令
武王征殷禮車孔夏四駟孔昕僕夫執轡載駢
載駟我與云安我馬惟閑雖馳雖驅匪逸匪愆
昔有淫羿馳騁忘歸景公千駟而淫于齊詩好
壯馬牧於坵野輦車就牧而詩人興魯廐焚問
人仲尼厚醜孟子蓋惡夫廐多肥馬而野有餓
殍僕臣司駕敢告執皂

廷尉箴

天降五刑惟憂之績亂茲平民不回不辟昔在
蚩尤爰作淫刑延于苗民夏氏不寧穆王羣荒
甫侯伊謀五刑訓天周以阜基厥後陵遲上帝
不飭周輕其制秦繁其辜五刑紛紛靡遏靡止
寇賊滿山刑者半道昔唐虞象刑天民是全紂
作炮烙墜民于淵故有國者無云何謂是刑是
剗無云何害是剗是剗惟虐惟殺人莫予柰殷
以刑顛秦以酷敗獄臣司理敢告執謁

大鴻臚箴

蕩蕩唐虞經通垓極陶陶百王天工人力畫爲
上下羅條百職人有材能察有級差遷能授官
各有攸宜主以不廢官以不隳昔在三代二季
不蠲穢德慢道署非其人人失其材職反其官
寀寮荒耄國政如漫文不可武武不可文大小
上下不可奪倫鴻臣司爵敢告在隣

宗正箴

巍巍帝堯欽親九族經哲宗伯禮有攸訓屬有
攸籍各有育子世以不錯昔在夏時太康不恭

有仍二女五子家降晉獻悼統宋宣亂序齊桓
不胤而忘其宗緒周譏戎女魯喜子同高作秦
崇而扶蘇被鹵宗廟荒墟魂靈靡附伯臣司宗
敢告執主

大司農箴

時惟大農爰司金穀自京徂荒粒民是斛肇自
厥初實施惟食厥僚后稷有無遷易實均實贏
惟都作程旁求衣食厥民攸生上稽二帝下閱
三王什一而征爲民作常遠近貢篚百姓不忘

帝王之盛咸在農殖季周爛漫而東作不勅膏
腴不獲庶物竝荒府藏單虛靡積靡倉陵遲衰
微姬卒以瘁秦收太半二世不瘳泣血之末海
內無聊農民司均敢告執繇

少府箴

實實少府奉養是供紀經九品臣子攸同海內
幣帑祁祁如雲家有孝子官有忠臣共僚率舊
聖則越遵民以不擾國以不煩昔在帝季癸辛
之世酒池糟隄而象箸以噬至於耽樂流湎而

妯妹作祟共察不御不恢憂殷喪其國康而卒
以陵遲嗜不可不察欲不可不圖未嘗失之於
約嘗失之於奢府臣司共敢告執觚

執金吾箴

溫溫唐虞重襲純執經表九德張設武官以御
寢賊如虎有牙如鷹有爪國以自固獸以自保
牙爪蔥蔥動作宜時用之不理實反生災秦政
暴戾播其虜虛亡其仁義而思其殘酷侯不可
重任威不可獨行堯咨虞舜惟思是尚吾臣司

金敢告執璜

將作大匠箴

侃侃將作經構宮室墻以禦風宇以蔽日寒暑
攸除鳥鼠攸去王有宮殿民有宅居昔在帝世
茅茨土階夏卑宮觀在彼溝洫桀作瑤臺紂爲
璇室人力不堪而帝業不卒詩詠宣王由儉改
奢觀豐上六大屋小家春秋譏刺書彼泉臺兩
觀雉門而魯以不恆或作長府而閔子不仁秦
築驪阿嬴姓以顛故人君無云我貴榱題是遂

母云我富澤作極渚在彼墻屋而忘其國戮作
臣司匠敢告執猷

城門校尉箴

幽幽山川徑塞九路盤石唐芒襲險重固國有
城溝家有柝拒各有攸堅民以不虞德懷其內
險難其外王公設險而承以盤蓋昔在上世有
殷有夏癸辛不德而設夫險阻湯武爰征而莫
遏莫禦作石之危不可德少而城溝伊保不可
德希而城溝是依唐虞長德而四海永懷秦恢

長城而天下畔乖尉臣司城敢告侍階

上林苑令箴

茫茫大田茫茫作穀山有陘陸野有林麓夷原
汚藪禽獸攸伏魚鼈以時芻蕘咸殖國以殷富
民以家給昔在帝羿共田徑游弧矢是尚而射
夫封豬不顧於愆卒遇後憂是以田獲三驅不
可過差麀鹿攸伏不如德至衡臣司虞敢告執
指

司空箴

普彼坤靈侔天作則分制五服黜爲萬國乃立
地官空惟是職茫茫九州都鄙盈區綱以群牧
縱以方侯烈烈雋乂翼翼王臣臣當其官官宜
其人九一之政七賦以均昔在季葉班祿遺賢
措克充朝而象恭潛天匪人斯力匪政斯勅流
貨市寵而苞苴是嚮王路斯浮孰不傾覆空臣
司土敢告在側

太常箴

翼翼太常實爲宗伯穆穆靈祗寢廟奕奕稱秩

元祀班于群神我祀既祗我粢孔蠲匪愆匪忒
公尸攸宜弗祈弗求惟德之報不矯不誣庶無
罪悔昔在成湯葛爲不弔棄禮慢祖夔子不祀
楚師是虜魯人躋僖臧文不悟文隳太室桓納
郤賂災降二宮用譖不祧故聖人在位無曰我
貴慢行繁祭無曰我材輕身恃巫東鄰之犧牛
不如西鄰麥魚秦殞望夷隱斃鍾巫常臣司宗
敢告執書

尚書箴

皇皇聖哲允勅百工命作齋慄龍爲納言是機
是密出入朕命王之喉舌獻善宣美而讒說是
折我視云明我聽云聰載風載夜惟允惟恭故
君子在室出言如風動於民人渙其大號而萬
國平信春秋譏漏言易稱不密則失臣允吉其
和巽吝其頻書稱其明申申厥鄰昔秦尚權詐
官非其人符璽竊發而扶蘇隕身一姦愆命七
廟爲墟威福同門牀上維辜書臣司命敢告侍
隅

博士箴

洋洋三代典禮是脩畫爲辟雍國有學校侯有
泮宮各有攸教德用不陵昔在文王經啟其軌
勗于德音而思皇多士多士作楨惟周以寧國
人與讓虞芮質成公劉挹行潦而濁亂斯清官
操其業士執其經昔聖人之綏俗莫美於施化
故孔子觀夫大學而知爲王之易易大舜南面
無爲而衽席平還師階級之間三苗以懷秦作
無道斬决天紀漫彼王迹而坑夫術士詩書是

泯家言是守俎豆不陳而顛其社稷故仲尼不
對問陳而胡篋是遵原伯非學而閔子知周之
不振儒臣司典敢告在賓

酒箴

子猶銚矣觀銚之居居井之湄處高臨深動常
近危酒醪不入口藏水消懷不得左右牽於纏
徽一旦重礙爲甕所輻身提黃泉骨肉爲泥自
用如此不如鴟夷鴟夷滑稽腹大如壺晝日盛
酒人復借酤常爲國器託於屬車出入兩宮經
營公家繇是言之酒何過乎

楊侍郎集卷之五

漢蜀郡楊雄子雲著

明閩漳張燮紹和纂

符命

劇秦美新文

有序

諸吏中散大夫臣雄稽首再拜上封事皇帝陛下臣雄經術淺薄行能無異數蒙渥恩拔擢倫比與群賢竝愧無以稱職臣伏惟陛下以至聖之德龍興登庸欽明尚古作民父母爲天下生

執粹清之道鏡照四海聽聆風俗博覽廣包參
天貳地兼竝神明配五帝冠三王開闢以來未
之聞也臣誠樂昭著新德光之異極往時司馬
相如作封禪一篇以彰漢氏之休臣常有顙朐
病恐一旦先犬馬填溝壑所懷不章長恨黃泉
敢竭肝膽寫腹心作劇秦美新一篇雖未究萬
分之一亦臣之極思也臣雄稽首再拜以聞曰
權輿天地未祛睢睢盱盱或玄而萌或黃而牙
玄黃剖判上下相嘔爰初生民帝王始存在乎

混混茫茫之時豐聞罕漫而不昭察世莫得而
云也厥有云者上罔顯於義皇中莫盛於唐虞
邇靡著於成周仲尼不遭用春秋因斯發言神
明所祚兆民所託罔不云道德仁義禮智獨秦
崛起西戎邠荒岐雍之疆因襄文宣靈之僭跡
立基孝公茂惠文奮昭莊至政破縱檀衡并吞
六國遂稱乎始皇盛從鞅儀韋斯之邪政馳驚
起翦恬賁之用兵剗滅古文刮語燒書弛禮崩
樂塗民耳目遂欲流唐漂虞滌殷蕩周難除仲

尼之篇籍自勒功業改制度軌量咸稽之於秦
紀是以耆儒碩老抱其書而遠遜禮官博士卷
其舌而不談來儀之鳥肉角之獸狙獼而不臻
其露嘉醴景曜浸潭之瑞潛大第經實巨狄鬼
信之妖發神歇靈繹海水羣飛二世而亡何其
劇與帝王之道競競乎不可離已夫能貞而明
之者窮祥瑞回而昧之者極妖慝上覽古在昔
有憑應而尚缺焉壞敝而能全故若古者稱堯
舜威侮者陷桀紂况盡汎埽前聖數千載功業

專用已之私而能享祐者哉會漢祖龍騰豐沛
奮迅宛葉自武關與項羽戮力咸陽創業蜀漢
發跡三秦克項山東而帝天下摘秦政慘酷尤
煩者應時而蠲如儒林刑辟歷紀圖典之用稍
增焉秦餘制度項氏爵號雖違古而猶襲之是
以帝典闕而不補王綱弛而未張道極數殫闇
忽不還逮至大新受命上帝還資后土顧懷玄
符靈契黃瑞涌出渾淳沕涌川流海濔雲動風
偃霧集雨散誕彌八圻上陳天庭震聲日景炎

光飛響盈塞天淵之間必有不可辭讓云爾於
是乃奉若天命窮寵極崇與天剖神符地合靈
契創億兆規萬世奇偉倜儻譎詭天祭地事其
異物殊怪存乎五威將帥班乎天下者四十有
八章登假皇穹鋪衍下土非新家其疇離之卓
哉煌煌真天子之表也若夫白鳩丹鳥素魚斷
虵方斯茂矣受命甚易格來甚勤昔帝纘皇王
纘帝隨前踵古或無焉而治或損益而亡豈如
新室委心積意儲恩垂務旁作穆穆明旦不寐

勤勤懇懇者非秦之爲與夫不勤勤則前人不
當不懇懇則覺德不愷是以發祕府覽書林通
幾乎文雅之圃翱翔乎禮樂之場胤殷周之失
業紹唐虞之絕風懿律嘉量金科玉條神卦靈
兆古文畢發煥炳照耀靡不宣臻式軫軒旂旗
以示之揚和鸞肆夏以節之施黼黻袞冕以昭
之正嫁娶送終以尊之親九族淑賢以穆之夫
改定神祇上儀也欽脩百祀咸秩也明堂雍臺
壯觀也九廟長壽極孝也制成六經洪業也北

懷單于廣德也若復五爵度三壤經井田免人
役方甫刑匡馬法恢崇祇庸燦德懿和之風廣
彼耆紳講習言諫箴誦之塗振鷺之聲充庭鴻
鸞之黨漸階俾前聖之緒布濩流行而不韞韜
郁郁乎煥哉天人之事盛矣鬼神之望允塞群
公先正罔不夷儀姦宄寇賊罔不振威紹少典
之苗著黃虞之裔帝典闕者已補王綱弛者已
張炳炳麟麟豈不懿哉厥被風濡化者京師沈
潛甸內市洽侯衛厲揭要荒濯沐而術前典巡

四民迄四嶽增封泰山禪梁父斯受命者之典
業也蓋受命日不暇給或不受命然猶有事矣
況堂堂有新正丁厥時崇嶽滄海通瀆之神咸
設壇塲望受命之臻焉海外遐方信延頸企踵
回面內嚮喁喁如也帝者雖勤惡可以已乎宜
命賢哲作帝典一篇奮三爲一襲以示來人摘
之罔極令萬世常戴巍巍履栗栗臭馨香含其
實鏡純粹之至精聆清和之正聲則百工伊凝
庶績咸熙荷天衢提地鼉斯天下之上則已庶

可試哉

連珠

連珠二首

臣聞明君取士貴拔衆之所遺忠臣薦善不廢格之所排是以巖穴無隱而側陋章顯也

臣聞天下有三樂有三憂焉陰陽和調四時不忒年穀豐遂無有天折災害不生兵戎不作天下之樂也聖明在上祿不遺賢罰不偏罪君子小人各處其位衆臣之樂也更不苟暴役賦不重財力不傷安土樂業民之樂也亂則反焉故

有三憂

誄

元后誄

新室文母太后崩天下哀痛號哭涕泗思慕功德咸上詞誄之銘曰

惟我有新室文母聖明皇太后姓出皇帝西陵昌意實生高陽純德虞帝孝聞四方登陟帝位禪受伊唐爰初胙土陳田至王營相厥宇渡河濟旁沙麓之靈太陰之精天生聖姿豫有祥禎作合于漢配元生成孝順皇姑承家尚莊內則

純被後烈丕光肇初配元天命是將兆徵顯見
新都黃龍漢成旣終胤嗣匪生哀帝承祚惟離
典經尚是言異大命俄顛厥年天隕大終不盈
文母覽之千載不傾博選大智新都宰衡明聖
作佐與圖國艱以度厄運徵立中山庶其可濟
博采淑女備其姪娣覲禮高禰祈廟嗣繼靡格
匪天靡動匪地穆穆明明昭事上帝弘漢祖考
夙夜匪懈興滅繼絕博立侯王親睦庶族昭穆
序明帝致友屬靡有遺荒咸被祚慶冀以金火

赤仍有央勉進大聖上下兼該祥祥歲瑞正秋
黃來火德將滅惟后于斯天之所壞人不敢交
哀平天折百姓分離祖宗之愆終其不全天命
有託謫在于前屬遭不造榮極而遷皇天眷命
黃虞之孫歷世運移屬在聖新代于漢劉受祚
于天漢祖承命赤傳于黃攝帝受禪立爲真皇
允受厥中以安黎衆漢廟黜廢移定安公皇皇
靈祖惟若孔臧降茲珪璧命服有常爲新帝母
鴻德不忘欽德伊何奉命是行菲薄服食神祇

是崇尊不虛統惟祇惟庸隆循人敬先民是從
承天祇家允恭虔恪豐阜庶卉旅力不射恤民
于留不皇詭作別計十邑國之是度還奉于此
以處貧薄罷苑置縣築里作宅以處貧窮哀此
嫠獨起常盈倉五十萬斛爲諸生儲以勸好學
志在黎元是勞是勤春巡灞漦秋臻黃山夏撫
鄠杜冬卹涇樊大射饗飲飛羽之門綬宥耆幼
不拘婦人刑女歸家以育貞信玄冥季冬搜狩
上蘭賓賓出日東秩暘谷鳴鳩拂羽戴勝降桑

蠶于繭館躬筐執曲帥導群妾咸循蠶族分繭
理絲女工是勅遐邇蒙祉中外禔福自京逮海
靡不仰德成類存生秉天地經無物不理無人
不寧尊號文母與新有成世奉長壽靡墮有傾
著德太常注諸旒旌嗚呼哀哉以昭鴻名享國
六十殂落而崩四海傷懷擗踊拊心若喪考妣
過密八音嗚呼哀哉萬方不勝德被海表彌流
魂精去此昭昭就彼冥冥忽兮不見超兮西征
旣作下宮不復故庭爰緘伊銘嗚呼哀哉

序傳

自序傳

楊雄字子雲蜀郡成都人也其先出自有周伯
僑者以支庶初食采於晉之楊因氏焉不知伯
僑周何別也楊在河汾之間周衰而楊氏或稱
侯號曰楊侯會晉六卿爭權韓魏趙興而范中
行知伯弊當是時偪楊侯楊侯逃於楚巫山因
家焉楚漢之興也楊氏遡江上處巴江州而楊
季官至廬江太守漢元鼎間避仇復遡江上處

嶧山之陽曰郛有田一壥有宅一區世世以農
桑爲業自季至雄五世而傳一子故雄亡宅楊
於蜀雄少而好學不爲章句訓詁通而已博覽
無所不見爲人簡易佚蕩口吃不能劇談默而
好深湛之思清靜亡爲少者欲不汲汲於富貴
不戚戚於貧賤不脩廉隅以徼名當世家產不
過十金乏無儋石之儲晏如也自有大度非聖
哲之書不好也非其意雖富貴不事也顧嘗好
辭賦先是蜀有司馬相如作賦甚弘麗溫雅雄

心壯之每作賦常擬之以爲式又怪屈原文過
相如至不容作離騷自投江而死悲其文讀之
未嘗不流涕也以爲君子得時則大行不得時
則龍蛇遇不遇命也何必湛身哉廼作書往往
摭離騷文而反之自崑山投諸江流以弔屈原
名曰反離騷又旁離騷作重一篇名曰廣騷又
旁惜誦以下至懷沙一卷名曰畔牢愁畔牢愁
廣騷文多不載獨載反離騷孝成帝時客有薦
雄文似相如者上方郊祠甘泉泰畤汾陰后土

以求繼嗣召雄待詔承明之庭正月從上甘泉
還奏甘泉賦以風甘泉本因秦離宮既奢泰而
武帝復增通天高光迎風宮外近則洪厓旁皇
儲胥弩陸遠則石關封巒枝鵲露寒棠梨師得
遊觀屈奇瑰偉非木摩而不雕牆塗而不畫周
宣所考般庚所遷夏卑宮室唐虞採椽三等之
制也且其爲已久矣非成帝所造欲諫則非時
欲默則不能已故遂推而隆之廼上比於帝室
紫宮若曰此非人力之所爲黨鬼神可也又是

時趙昭儀方大幸每上甘泉常法從在屬車間
豹尾中故雄聊盛言車騎之衆參麗之駕非所
以感動天地逆釐三神又言屏玉女卻處妃以
微戒齊肅之事賦成奏之天子異焉其三月將
祭后土上廼帥群臣橫大河濊汾陰旣祭行遊
介山回安邑顧龍門覽鹽池登歷觀陟西岳以
望八荒迹殷周之虛眇然以思唐虞之風雄以
爲臨川羨魚不如歸而結罔還上河東賦以勸
十二月羽獵雄從以爲昔在二帝三王宮館臺

榭沼池苑園林麓藪澤財足以奉郊廟御賓客
充庖厨而已不奪百姓膏腴穀土桑柘之地女
有餘布男有餘粟國家殷富上下交足故甘露
零其庭醴泉流其唐鳳凰巢其樹黃龍游其沼
麒麟臻其囿神爵棲其林昔者禹任益虞而上
下和中外木茂成湯好田而天下用足文王囿百
里民以爲尚小齊宣王囿四十里民以爲大裕
民之與奪民也武帝廣開上林南至宜春鼎胡
御宿昆吾旁南山而西至長楊五柞北繞黃山

瀕涓而東周袤數百里穿昆明池象滇河營建
章鳳闕神明駟娑漸臺泰液象海水周流方丈
瀛州蓬萊遊觀侈靡窮妙極麗雖頗制其三垂
以贍齊民然至羽獵田車戎馬器械儲侍禁禦
所營尚泰奢麗誇詡非堯舜成湯文王三驅之
意也又恐後世復脩前好不折中呂泉臺故聊
因校獵賦以風明年上將大誇胡人以多禽獸
秋命右扶風發民入南山西自褒斜東至弘農
南毆漢中張羅罔罝罾捕熊羆豪豬虎豹狢獾

狐兔麋鹿載以檻車輪大楊射熊館以罔爲周
陸縱禽獸其中令胡人手搏之自取其獲上親
臨觀焉是時農民不得收歛雄從至射熊館還
上長楊賦聊因筆墨成文章故藉翰林以爲主
人子墨爲客卿以風哀帝時丁傅董賢用事諸
附離之者或起家至二千石時雄方草太玄有
以自守泊如也或譌雄以玄尚白而雄解之號
曰解詡雄以爲賦者將以風也必推顯而言極
麗靡之辭閎侈鉅衍競於使人不能加也旣廼

歸之於正然覽者已過矣往時武帝好神仙相
如上大人賦欲以風帝反縹縹有凌雲之志繇
是言之賦勸而不止明矣又頗似俳優淳于髡
優孟之徒非法度所存賢人君子詩賦之正也
於是輟不復爲而大潭思渾天參摹而四分之
極於八十一旁則三摹九据極之七百二十九
贊亦自然之道也故觀易者見其卦而名之觀
玄者數其畫而定之玄首四重者非卦也數也
其用自天元推一畫一夜陰陽數度律歷之紀

九九大運與天終始故玄三方九州二十七部
八十一家二百四十三表七百二十九贊分爲
三卷曰一二三與泰初歷相應亦有顓頊之歷
焉樞之以三策開之以休咎緝之以象類捕之
以人事文之以五行擬之以道德仁義禮知無
主無名要合五經苟非其事文不虛生爲其泰
曼漶而不可知故有首衝錯測攤瑩數文梘圖
告十一篇皆以解剥玄體離散其文章句尚不
存焉玄文多故不著觀之者難知學之者難成

客有難玄大深衆人之不好也雄解之號曰解
難雄見諸子各以其知舛馳大氏詆訾聖人卽
爲怪迂析辯詭辭以撓世事雖小辯終破大道
而惑衆使溺於所聞而不自知其非也及太史
公記六國歷楚漢訖麟止不與聖人同是非頗
謬於經故人時有問雄者常用法應之譏以爲
十三卷象論語號曰法言法言文多不著獨著
其目

附錄

楊雄傳贊

漢班固

贊曰雄之自序云

師古曰自法言曰之前皆是雄本自叙之文也

初雄

年四十餘自蜀來至游京師大司馬車騎將軍王音奇其文雅召以爲門下史薦雄待詔歲餘奏羽獵賦除爲郎給事黃門與王莽劉歆並哀帝之初又與董賢同官當成哀平間莽賢皆爲三公權傾人主所薦莫不拔擢而雄三世不徙官及莽篡位談說之士用符命稱功德獲封爵

者甚衆雄復不侯以耆老久次轉爲大夫恬於
執利廼如是實好古而樂道其意欲求文章成
名於後世以爲經莫大於易故作太玄傳莫大
於論語作法言史篇莫善於倉頡作訓纂箴莫
善於虞箴作州箴賦莫深於離騷反而廣之辭
莫麗於相如作四賦皆斟酌其本相與放依而
馳騁云用心於內不求於外於時人皆習之唯
劉歆及范滂敬焉而桓譚以爲絕倫王莽時劉
歆甄豐皆爲上公莽旣以符命自立卽位之後

欲絕其原以神前事而豐子尋歆子蔡復獻之
莽誅豐父子投蔡四裔辭所連及便收不請時
雄校事天祿閣上治獄事使者來欲收雄雄恐
不能自免廼從閣上自投下幾死莽聞之曰雄
素不與事何故在此問請問其故廼劉棻嘗從
雄學作奇字雄不知情有詔勿問然京師爲之
語曰惟寂寞自投閣爰清靜作符命雄以病免
復召爲大夫家素貧者酒人希至其門時有好
事者載酒肴從游學而鉅鹿侯芭常從雄居受

其太玄法言焉劉歆亦嘗觀之謂雄曰空自苦
今學者有祿利然尚不能明易又如玄何吾恐
後人用覆瓿也雄笑而不應年七十一天鳳
五年卒侯芭爲起墳喪之三年時大司空王邑
納言嚴尤聞雄死謂桓譚曰子常稱楊雄書豈
能傳於後世乎譚曰必傳顧君與譚不及見也
凡人賤近而貴遠親見楊子雲祿位容貌不能
動人故輕其書昔老聃著虛無之言兩篇薄仁
義非禮學然後世好之者尚以爲過於五經自

漢文景之君及司馬遷皆有是言今楊子之書
文義至深而論不詭於聖人若使遭遇時君更
閱賢知爲所稱善則必度越諸子矣諸儒或譏
以爲雄非聖人而作經猶春秋吳楚之君僭號
稱王蓋誅絕之罪也自雄之沒至今四十餘年
其法言大行而玄終不顯然篇籍具存

墨池準易堂記

朱何涉

道昧於叔世而白於盛時迹毀於無知而伸於
有識蓋其常爾楊子雲歷漢哀平新莽際號爲
名儒聲光馮馮雖千百年亡輒衰貶有宅一區
在錦官西郭隘巷著書墨池存焉後代追思其
賢立亭池端歲時來游入魏晉李唐其間興衰
如蠓虻薨如蠅營營侵晦謹誦之聲未窮而氏
姓俄變獨子雲之宅巋然下據不被廢徹亦足
以信其材度藝學爲世所仰也王德數盡中原

潰喪王建草竊進攘蜀土固不暇識所謂楊子
雲何人也宅與墨池垣入官界爲倉庾地至知
祥昶世及皇朝仍而弗革淳化甲午紀順旹放
兵燒掠隆隆積廩化作灰皁賊平主者因其地
改創營塢以休養卒徒環堵儒宮彌益汗辱慶
曆丁亥今相國集賢文公適尹是都命吏尋遺
趾畫疆以還其舊然屋已名龍女堂池復堙塞
澳漭矣方議疏葺而遽迫入覲事用中寢提刑
司田郎高侯惟幾睹荒圯渺莽咨嗟久之且言

子雲八十一首十三篇述之箴頌其辭義與遠
山生澤漫上與三代經訓相標標士大夫用其
道反細其迹如聳清抹俗之風將墜地弗振何
退論賢僚名卿歛俸餘以圖經構直北而堂曰
準易繪子雲遺像正位南嚮諸公儀觀列東西
序池心築臺置亭其上曰解嘲前距午際軒楹
對起以須宴會曰吐鳳竒葩雜樹移植交帶垂
茗森列氣象藹藹三月晦凡土木黜陟之事畢
成君子謂是舉也扶旣廢補久闕其激勸風旨

雖古人不過矧夫資識端亮學術雄富若導積
石引長河愈久愈洪文章麗密據法裁諛若衣
藻火以退胡服故舉動建置皆可師小子不文
承命恐悚謹爲之記

漢法玄先生墓記

明郭子華

予入郾進諸生問楊子雲亭對曰楊子故有亭
已改爲書院祀楊子其中已復改爲學宮移楊
子祀鄉賢無復亭矣問楊子胤對曰郾無後楊
子者予曰楊子五世俱獨傳一子宜不蕃今海
內亦鮮楊姓者微獨郾也問楊子墓對曰墓在
邑西二十里蕪穢不治里中兒樵牧其上行道
嗟憐予曰是卽非侯巴所名玄冢者疑衣冠塋
也不宜盡銷滅乃檄有司封之上周遭樹以栢

下令禁樵牧成都守耿子健衆耶令李某請題其墓石予題之曰漢楊法玄先生之墓子健手書之付耶令勒之玄石耶人而后乃今知死士壘貴矣夫法何也法言也夫玄何也太玄也楊子著書繁富如反騷廣騷畔牢愁甘泉羽獵等篇至老而悔之獨法與玄其大者蔡中郎題太丘曰文範顏延之題元亮曰靖節皆其大也嗟乎世之訾揚子者訾其不死漢而臣莽予師胡廬山先生爲揚子辯未仕莽累千言顧亦未有

確據美新安漢二篇卽揚子百曉錄以自解予
謂美新不刺漢而刺秦法言不曰繼漢而曰安
漢揚子之心蓋亦有大不得已焉者且古今國
亡而死者度不死無爲也其不死者恐其死將
有爲也殷亡矣洪範未衍箕子何以死子糾亡
矣春秋未一匡四稱八觀諸書未就管仲何以
死司馬遷辱矣史記未竟遷何以死故曰死有
重於泰山又惡知法言太玄二書不就於漢亡
之後邪又惡知揚子之不死不爲是邪予因題

揚子墓而系之曰法玄明不死意也嗟夫李令
伯喈漢爲僞朝予過彭山冢嶽嶽若封譙周勸
後主降魏而千年一丘坐掘克國之堂又何於
揚子過之深邪而不一剪其松區也

揚子雲讚

北魏常景

蜀江導清流揚子挹餘休含光絕後彥覃恩邈
前脩世輕久不賞玄談物無求當途謝權寵置
酒得閒遊

揚子宅

唐王勃

亂竹開三徑飛花滿四鄰從來揚子宅別有尙
玄人

草玄堂

唐岑參

吾悲子雲居寂寞人已去娟娟西江月猶照草

玄處精怪意無人睢盱藏老樹

揚子雲墨池二首

宋宋 祁

君不見子雲草玄西郭門一逕秋草閒朝昏何
須筆冢高百尺池墨黯黯今猶存童烏侯芭竟
零落玄學無人終寂寞漢家執戟知幾年垂老
身投天祿閣俗兒紛紛重劉向思苦言艱動嘲
謗漢已中天雄亦亡不較空文從覆瓿如今却
作給孤園吐鳳亭前池水寒安得斯人尚可作
會有奇字令君看

宅廢經池在人亡墨溜翰蟾蜍兼滴破科斗共
書殘蠹罷芸猶翠蒸餘竹自寒長揚無可問撫
物費長歎

揚子雲二首

宋王安石

子雲遊天祿華藻銳初學覃思晚有得晦顯無
適莫寥寥鄒魯後於此歸先覺豈甞知符命何
苦自拔閣長安諸愚儒操行自爲薄謗嘲出異
已傳載因疏略孟軻勸伐燕伊尹于說亳叩馬
觸兵鋒食牛要祿爵少知羞不爲况彼皆卓犖

史官蔽多聞自古喜穿鑿

子雲平生人莫知知者乃獨稱其辭今尊子雲者皆是得子雲心亦無幾聖賢樹立自有師人知不知無以爲俗人賤今常貴古子雲今存誰女數

揚子雲草亭

宋蔡 禎

獨步城西路蕭條一草亭古苔環徑碧修竹遶軒清石鑿觀書所碑鐫陋室銘草玄今已矣千載想儀刑

揚子宅

宋濂 羸

寂寞一區宅沈冥千載豪但輕執戟賤誰識草
玄高蝌蚪猶翻墨提壺欲載醪著書端有意不
必反離騷

揚子宅

宋邵 博

自負天人學甘居寂寞濱却鄰載酒客似識草
玄人三世官應拙一區宅更貧千年尋故里感
涕獨沾巾

揚子雲

明張 燮

揚子探微言甘心棲寂寞時出解嘲篇任多問
奇酌雕蟲薄不爲吐鳳雅有作未藉來禊傳吾
玄亮可托

遺事

余少時見揚子雲麗文高論不量年少猥欲逮
及常作小賦用精思大劇而直感動發病子雲
亦言成帝上甘泉詔使作賦爲之卒暴倦卧夢
其五臟出地及覺大少氣病一歲

桓子
新論

楊雄少從嚴君平遊學迨仕京師顯名數爲朝
賈稱君平德杜陵李彊爲益州牧喜謂雄曰吾
真得君平矣雄曰君備禮待之彼人可見不可
得詘也彊心以爲不然及至蜀致禮與相見卒

不敢言以爲從事乃歎曰楊子雲誠知人

漢書

張衡謂崔瑗曰觀太玄方知子雲妙極道數乃與五經相擬漢家得天下二百歲之書也漢四

百歲玄其興矣

張衡傳

楊子雲作法言蜀富人賁錢千萬願載於書子

雲不聽

論衡

郭威字文偉謂爾雅周公所制而有張仲孝友張仲宣王時人非周公之制明矣余嘗以問揚子雲子雲曰孔子門徒游夏之儔所記以解釋

六藝者也家君以為外戚傳稱史佚教其子以
爾雅爾雅小學也又記言孔子教魯哀公學爾
雅爾雅之出遠矣舊傳學者皆云周公所記也
張仲孝友之類後人所足耳按荀洪稱劉歆撰
西京雜記中載此
段揚用修誤載孔子門徒以下作維答郭威書
味誤悔禹金駁之曰此維各劉歆語本實非書
是矣然細觀語意只孔子門徒游夏之儔所記
以解釋六藝者也此句是雄答歆語家君以下
是歆引父向之言並與
雄語無干附識于此

楊雄讀書有人語之曰無為自苦玄故難傳忽
然不見雄著太玄經夢吐鳳凰集玄之上頃而

滅西京雜記

揚子雲好事常懷鉛提槧從諸計吏訪殊方絕

域四方之語以爲禪補輜軒所載

西京雜記

揚子雲難蓋天八事以通渾天其一云日之東行循黃道晝中規牽牛距北極北百一十度東井距北極南七十度并百八十度周三徑一二十八宿周天當五百四十度今三百六十度何也其二曰春秋分之日正出在卯入在酉而晝漏五十刻卽天蓋轉夜當倍晝今夜亦五十刻

何也其三曰日入而星見日出而不見卽斗下見日六月不見日六月北斗亦常見六月不見六月今夜常見何也其四曰以蓋國視天河起斗而東入狼弧間曲如輪今視天河直如繩何也其五曰周天二十八宿以蓋國視天星見者當少不見者當多今見與不見等何出入無冬夏而兩宿十四星常見不以日長短故見有多少何也其六曰天至高也地至卑也日託大而旋可謂至高矣縱人目可奪水與景不可奪也

今從高山以水望日日出水下影上行何也
其七曰視物近則大遠則小今日與北斗近我
而小遠我而大徧也其八曰視蓋橑與車輻間
近杠轂卽密益遠益疎今北極爲天杠轂二十
八宿爲天橑輻以星度度天南方次地星間當

數倍今交密何也

隋書天文志

集評

玩楊子雲之篇樂於居千石之官挾桓君山之
書富於積倚頓之財

論衡

揚子雲作太玄造法言張伯松不肯一觀與之
併肩故賤其言使子雲在伯松前伯松以爲金
匱矣

論衡

先是楊雄作酒箴以諷諫成帝其文爲酒客難
法度士譬之於物陳遵大喜之常謂張竦吾與
爾猶是矣

漢書陳遵傳

子雲屬意辭人最深觀其涯度幽遠搜選詭麗

而竭才以鑽思故能理瞻而辭堅矣

文心
雕龍

子雲沈寂故志隱而味深

文心
雕龍

揚雄甘泉酌其餘波語環奇則假珍于玉樹言

峻極則顛墜于鬼神

文心
雕龍

揚雄覃思文閣業深綜述碎文璅語肇爲連珠

其辭雖小而明潤矣

文心
雕龍

揚雄解嘲雜以諸謹廻環自釋頗亦爲工

文心
雕龍

揚雄稽古始範虞箴卿尹州牧廿五篇及崔胡

補綴總稱百官指事配位肇鑑可徵信所謂追

清風於前古攀辛甲於後代也

文心
雕龍

劇秦爲文影寫長卿詭言遯辭故兼包神怪然

骨掣摩密辭貫圓通自稱極思無遺力矣

文心
雕龍

前聖旣沒微言卽淪惟鄒國孟軻蘭陵荀况下

及劉世復生揚雄咸能著書更相樹道闢王基

於絕代振天爵於群倫

宋咸
表

糾繆

太玄經之末有玄衝玄錯玄攤玄瑩玄數玄文
玄規玄圖玄告等篇蓋擬易之繫辭也俗儒不
識太玄偶見廣文選曾列玄攤一篇遂謂子雲
秘作混載集中殊覺非類若經可入集又豈獨
收一玄攤也今刪去